

重刊巢氏諸病源候總論

五



重刊巢氏諸病源候總論卷之九

時氣病諸候

凡四十二論

時氣候

時行病者是春時應暖而反寒夏時應熱而反冷秋時應涼而反熱冬時應寒而反溫非其時而有其氣是以一歲之中病無長少率相似者此則時行之氣也從春分後其中無暴大寒不冰雪而人有壯熱為病者此則屬春時陽氣發於冬時伏寒變為溫病也從春分以後至秋分節前天有暴寒者皆為時行寒疫也一名時行傷寒此是節候有寒傷於人非觸冒之過也若三月四月有暴寒其時陽氣尚弱為寒所折病熱猶小輕也五月六月陽氣已盛為寒所折病熱則重也七月八月陽氣已衰為寒所折病熱亦小微也其病與溫及

暑病相似但治有殊耳然得時病一日在皮毛當摩膏火灸
愈不解者二日法針服行解散汗出愈不解三日復發汗若
大汗即愈不解止勿復發汗也四日服藜蘆丸微吐愈若病
因藜蘆丸不吐者服赤豆瓜蒂散吐已解視病者尚未了了
者復一法針之當解不愈者六日熱已入胃乃與雞子湯下
之愈百無不如意但當諦視節度與病耳食不消病亦如時
行俱發熱頭痛食病當速下之時病當待六七日下之時病
始得一日在皮二日在膚三日在肌四日在胃五日入胃入
胃乃可下也熱在胃外而下之熱承虛便入胃然病要當復
下之不得下胃中餘熱置此為病二死一生此輩不愈胃虛
熱入胃爛微者亦斑出五死一生劇者黑斑出十死一生病
人有強弱相倍也若得病無熱但狂言煩躁不安精神語言
與人不相主當者勿以火迫但以清冷散一方寸匕已上飲

之以一升若升半水可至一升益佳當以新汲井水強令飲以指刺喉中吐之隨手愈不時吐者此病皆多不瘳勿以餘藥治也不相主當必危若此病不時以猪苓散吐解之者其殆速死亦可先以法針之尤佳以病者過日不以時得下之熱不得泄亦胃爛矣其湯熨針石別有正方補養宣導參附於後

養生方導引法云清旦初起以左右手交互從頭上挽兩耳舉又引鬢髮即流通令頭不白耳不聾又摩手掌令熱以摩面從上下一七正去肝氣令面有光又摩手令熱令熱從體上下名曰乾浴令人勝風寒時氣寒熱頭痛百病皆愈

時氣一日候

時氣病一日太陽受病太陽為三陽之首主於頭項故得病一日頭項腰痛

時氣二日候

時氣病一日陽明受病陽明主於肌肉其脈絡鼻入目故病二日內熱鼻乾不得眠夫諸陽在表始受病故可摩膏火多發汗而愈

時氣三日候

時氣病二日少陽受病少陽脈循於脇上於頸耳故得病三日胃脇熱而耳聾也三陽經絡始相傳病未入於藏故可下而愈

時氣四日候

時氣病四日太陰受病太陰為三陰之首二日已後諸陽乎病訖即傳之於陰太陰之脉主於喉嗌故得病四日腹滿而盛乾其病在胃鬲故可吐而愈也

時氣五日候



時氣病五日少陰受病少陰脉貫腎絡肺繫於舌故得病五日口熱舌乾而引飲其病在腹故可下而愈

時氣六日候

時氣病六日厥陰受病厥陰脉循陰器絡於肝故得病六日煩滿而陰縮此為三陰二陽俱受病毒氣入於腸胃故可下而愈

時氣七日候

時氣病七日法當小愈所以然者陰陽諸經傳病竟故也今病不除者欲為再經病也再經病者謂經絡重受病也

時氣八九日已上候

時氣病八九日已上不解者或是諸經絡重受於病或已發汗吐下之後毒氣未盡所以病不能除或一經受病未即相傳致使停滯累日病證不改者故皆當察其證候而治之

時氣取吐候

夫得病四日毒在胃鬲故宜取吐有得病二三日便心胃煩滿此為毒氣已入或有五六日已上毒氣猶在上焦者其人
有痰實故也所以復宜取吐也

時氣煩候

夫時氣病陰氣少陽氣多故身熱而煩其毒氣在於心而煩者則令人悶而欲嘔若其人胃内有燥糞而煩者則謬語時
繞臍痛腹為之滿皆當察其證候也

時氣狂言候

夫病甚則棄衣而走登高而歌或至不食數日踰垣上屋所
上非其素時所能也病反能者皆陰陽爭而外并於陽四支
者諸陽之本也邪盛則四支實實則能登高而歌熱盛於身
故棄衣而走陽盛故妄言罵詈不避親戚大熱遍身狂言而

并見妄聞之

時氣嘔候

胃家有熱穀氣入胃與熱相并氣逆則嘔或吐下後飲食多胃虛冷亦為嘔也

時氣乾嘔候

熱氣在於脾胃或發汗解後或大下之後胃內不和尚有蓄熱熱氣上熏故心煩而嘔也

時氣噦候

伏熱在胃令人胃滿則氣逆氣逆則噦若大下後胃氣虛冷亦令致噦也

時氣嗽候

熱邪客於肺上焦有熱其人必飲水水停心下則上乘於肺故上氣而嗽也

時氣渴候

熱氣入於胃藏腎惡燥熱氣盛則腎燥腎燥故渴而引飲也

時氣衄血候

時氣衄血者五臟熱結所為心主於血邪熱中於手少陰之經客於足陽明之絡故衄血也衄者血從鼻出也

時氣吐血候

諸陽受病不發其汗熱毒入深結在五臟內有瘀血積故令吐血也

時氣口瘡候

發汗下後表裏俱虛而毒氣未盡熏於上焦故喉口生瘡也

時氣喉咽痛候

陰陽隔絕邪客於足少陰之絡毒氣上熏攻於咽喉故痛或生瘡也

時氣發斑候

夫熱病在表已發汗未解或吐下後熱毒氣不散煩躁謬言語此為表虛裏實熱氣躁於外故身體發斑如錦文凡發斑不可用發表藥令瘡開泄更增斑爛表虛故也

時氣毒攻眼候

肝開竅於目肝氣虛熱毒乘虛上衝於目故赤痛或生翳赤白膜息肉及瘡也

時氣毒攻手足候

熱毒氣從藏府出攻於手足手足則焮熱赤腫疼痛也人五藏六府并榮俞皆出於手足指故此毒從內而出也

時氣胞瘡候

夫表虛裏實熱毒內盛則多發胞瘡重者周匝遍身其狀如火瘡若根赤頭白者則毒輕若色紫黑則毒重其瘡形如登

豆亦名登豆瘡

時氣瘰癧候

夫病新瘰血氣未復皮膚尚虛疎而觸冒風日則徧體起細瘰瘰癧如癰疥狀名為逸風

時氣蠱候

毒氣結在腹內穀氣衰毒氣盛三蟲動作食人五臟多令洩利下部瘰癧若脣内生瘰但欲寐者此蟲食下部也重者肛爛見五藏也

時氣熱利候

此由熱氣在於腹胃挾毒則下黃赤汁也

時氣膿血利候

此由熱傷於腸胃故下膿血如魚腦或如爛肉汁壯熱而腹疔痛此濕毒氣所為也



時氣蠶利候

夫熱蓄在藏多令人下利若毒氣盛則變膿血因而成蠶蠶者蟲食人五藏及下部也若食下部則令穀道生瘡而下利名爲蠶利若但生瘡而不利者爲蠶也

時氣大便不通候

此由脾胃有熱發汗太過則津液竭津液竭則胃乾結熱在內大便不通也

時氣小便不通候

此由汗後津液虛少其人小腸有伏熱故小便不通也

時氣陰陽毒候

此謂陰陽二氣偏虛則受於毒若病身重腰脊痛煩悶面赤斑出咽喉痛或下利狂走此爲陽毒若身重背強短氣嘔逆脣青面黑四支逆冷爲陰毒或得病數日變成毒者或初得

病便有毒者皆宜依證急治失候則殺人

時氣變成黃候

夫時氣病濕毒氣盛蓄於脾胃脾胃有熱則新穀鬱蒸不能消化大小便結澀故令身面變黃或如橘柚或如桃枝色

時氣變成瘡候

病後邪氣未散陰陽尚虛因為勞事致一氣交爭陰勝則發寒陽勝則發熱故令寒熱往來有時休作而成瘡

時氣敗候

此謂病後餘毒未盡形證變轉久而不瘥陰陽無復綱紀名為敗病

時氣勞復候

夫病新瘥者血氣尚虛津液未復因即勞動更成病焉若言語思慮則勞於神梳頭澡洗則勞於力未堪勞而強勞之

生執執氣還經絡復為病者名曰勞復

時氣食復候

夫病新瘥者脾胃尚虛穀氣未復若即食肥肉魚鱠餅餌棗栗之屬則未能消化停積在於腸胃使脹滿結實因更發熱復為病者名曰食復也

時氣病瘥後交接勞復候

夫病新瘥者陰陽二氣未和早合房室則令人陰腫入腹腹內疝痛名為交接勞復

時氣病後陰陽易候

陰陽易病者是男子婦人時氣病新瘥未平復而與之交接受得病者名陰陽易也其男子病新瘥未平復而婦人與之交接受得病者名曰陽易其婦人得病新瘥未平復而男子與之交接受得病者名曰陰易若一男一女並不相易所以呼為易

者陰陽相感動其毒度著於人如換易也其病之狀身體熱衝胃頭重不能舉眼中生眵四支拘急小腹疔痛手足拳皆即死其亦有不即死者病苦小腹裏急熱氣上衝胃頭重不欲舉百節解離經脉緩弱氣血虛骨髓竭使怵怵吸吸氣力轉少着牀不能搖動起居仰人或引歲月方死

時氣病後虛羸候

夫人榮衛先虛復為邪熱所中發汗吐下之後經絡損傷陰陽竭絕虛邪始散真氣尚少五臟猶虛穀神未復無津液以榮養故虛羸而生衆病焉

時氣陰荒腫候

此由腎臟虛所致腎氣通於陰今腎為執邪所傷毒氣下流故令陰腫

時氣今不相染易候

夫時氣病者此皆因歲時不和溫涼失節人感乖戾之氣而生病者多相染易故預服藥及爲大法以防之

熱病諸候

凡二十八論

熱病候

熱病者傷寒之類也冬傷於寒至春變爲溫病夏變爲暑病暑病者熱重於溫也肝熱病者小便先黃腹脹痛多臥身熱熱爭則狂言及驚脇滿痛手足躁不安卧庚辛甚甲乙大汗氣逆則庚辛死心熱病者先不樂數日乃熱熱爭則卒心痛煩冤善嘔頭痛面赤無汗至壬癸甚丙丁大汗氣逆則壬癸死脾熱病者先頭重煩煩心欲嘔身熱熱爭則腰痛腹滿吐兩頰痛甲乙甚戊己大汗氣逆則甲乙死肺熱病者先漸然起毛惡風舌黃身熱熱爭則喘咳痺走胃焦背不得大息

頭痛不甚汗出而寒丙丁甚庚辛大汗氣逆則丙丁死腎熱
病者先腰痛脛酸苦渴數飲身熱熱爭則項痛而強脛寒骨
且酸足下熱不欲言其項痛淖澹戊己甚壬癸大汗氣逆則
戊己死肝熱病者左頰先赤心熱病者額先赤脾熱病者鼻
先赤肺熱病者右頰先赤腎熱病者頤先赤凡病雖未發見
其赤色者刺之名曰治未病一日汗不出大瀉發者死二日
泄而腹滿甚者死三日目不明熱不已者死四日老人嬰兒
熱而腹滿者死五日汗不出嘔血者死六日舌本爛熱不已
者死七日欬血衄血汗不出出不至足者死八日髓熱者死
九日熱而痤者死凡此者不可刺也熱病已得汗而脉尚躁
盛此陰脉之極也死其得汗而脉靜者生熱病者脉常盛躁
而不得汗者此陽脉之極也死脉盛躁得汗者生熱病七八
日脉微小病者溲血口中乾一日半死脉代一日死熱病已

